

بِسْمِ اللَّهِ الرَّحْمَنِ الرَّحِيمِ

## PELANJUTAN PENUTUPAN SEMENTARA MASJID, SURAU DAN BALAI IBADAT SELURUH NEGARA BRUNEI DARUSSALAM BAGI MINGGU TUJUH

1. Pada menjunjung titah perkenan Kebawah Duli Yang Maha Mulia Paduka Seri Baginda Sultan Haji Hassanal Bolkiah Mu'izzaddin Waddaulah ibni Al-Marhum Sultan Haji Omar Ali Saifuddien Sa'adul Khairi Waddien, Sultan dan Yang Di-Pertuan Negara Brunei Darussalam, Kementerian Hal Ehwal Ugama ingin mengumumkan bahawa oleh kerana masih ada kekhawatiran mengenai bahaya jangkitan COVID-19 di negara kita, maka penutupan sementara masjid, surau dan balai-balai ibadat seluruh negara yang akan berakhir pada waktu 'Isya malam ini, 04 Ramadhan 1441 Hijrah bersamaan 27 April 2020 Masehi adalah dilanjutkan lagi selama satu minggu mulai hari Selasa, 04 Ramadhan 1441 Hijrah bersamaan 28 April 2020 Masehi hingga hari Isnin, 11 Ramadhan 1441 Hijrah bersamaan 04 Mei 2020 Masehi.
2. Ketetapan penutupan sementara ini dibuat dalam Mesyuarat Khas Majlis Ugama Islam Brunei pada hari Khamis, 29 Sya'ban 1441 Hijrah bersamaan 23 April 2020 Masehi berdasarkan keterangan daripada Kementerian Kesihatan berhubung dengan keperluan meneruskan langkah-langkah membendung penularan jangkitan wabak COVID-19 dan berpandukan Hukum Syara' mengenainya sebagaimana yang difatwakan dalam Fatwa Mufti Kerajaan bil. 02/2020.
3. Untuk kemudahan orang ramai, Majlis Ugama Islam Brunei telahpun mengeluarkan tatacara Pembayaran Zakat Fitrah dan Harta Sepanjang Bulan Ramadhan Tahun 1441 Hijrah / 2020 Masehi melalui eposter dan berita mengenainya yang telah dikeluarkan.

M.S: 1 - 3

4. Masjid, surau dan balai-balai ibadat akan dibuka untuk pembayaran zakat fitrah dan harta mulai jam 8.30 pagi hingga 11.00 pagi dan 1.00 petang hingga 3.00 petang setiap hari dengan mematuhi garis pandu Kementerian Kesihatan terutama penjarakan fizikal dan sosial di kawasan ruang legar atau beranda masjid sahaja. Jika sekiranya sesebuah masjid berkenaan tidak mempunyai ruangan sedemikian, maka satu ruangan lain di kawasan berhampiran masjid akan digunakan. Bagi langkah-langkah lain untuk memudahkan pembayaran zakat fitrah dan harta, usaha-usaha juga sedang diatur agar pembayaran zakat fitrah dan harta dapat dibuat di bangunan-bangunan utama Kementerian-kementerian secara berjadual. Amil-amil dari Jabatan Majlis Ugama Islam akan menjalankan kutipan tersebut.
5. Kementerian Hal Ehwal Ugama mengambil peluang menasihatkan orang ramai untuk melaksanakan tanggungjawab pembayaran zakat lebih awal bagi mengelakkan kesesakan atau terpaksa beratur panjang di saat-saat akhir sepertimana pengalaman-pengalaman lalu apabila ramai umat Islam yang membayar zakat fitrah mereka pada “malam pukol” iaitu malam Hari Raya Aidilfitri.
6. Berhubung dengan sembahyang Tarawih yang ditimbulkan oleh media, Kementerian Hal Ehwal Ugama sukacita menghargai umat Islam di negara ini mengerjakannya di rumah-rumah kediaman masing-masing bersama ahli-ahli keluarga dengan berpandukan kepada garis pandu Kementerian Kesihatan tentang bilangan dan kesesuaian ruangan dalam rumah dengan mengambil kira penjarakan fizikal dan imam tarawih mereka dari kalangan keluarga yang mana dalam hubungan ini sangat menggembirakan. Dalam pada itu, Kementerian Hal Ehwal Ugama mengambil maklum ada setengah-tengah keluarga yang memerlukan imam dari bukan kalangan keluarga yang memang sudah biasa iaitu guru-guru ugama bertauliah yang menjadi guru dan imam mereka, maka yang sedemikian itu adalah dibenarkan.

7. Mengenai pembacaan Doa Qunut Nazilah sebagaimana Titah Perutusan Kebawah Duli Yang Maha Mulia Paduka Seri Baginda Sultan Haji Hassanal Bolkiah Mu'izzaddin Waddaulah ibni Al-Marhum Sultan Haji Omar Ali Saifuddien Sa'adul Khairi Waddien, Sultan dan Yang Di-Pertuan Negara Brunei Darussalam Sempena Menyambut Bulan Ramadhan Tahun 1441 Hijrah / 2020 Masehi baru-baru ini, Kementerian Hal Ehwat Ugama telah menyediakan teks Doa Qunut Nazilah yang ringkas dan padat untuk diedarkan kepada orang ramai yang boleh juga didapati melalui media sosial. Teks Doa Qunut Nazilah yang disediakan ini sebahagian besarnya adalah Doa Qunut biasa yang dibaca semasa sembahyang fardhu subuh dengan sedikit tambahan yang berkaitan dengan wabak. Maka selaku rakyat negara ini, sama-samalah kita menjunjung kasih di atas kurnia titah Kebawah Duli Yang Maha Mulia Paduka Seri Baginda Sultan Haji Hassanal Bolkiah Mu'izzaddin Waddaulah ibni Al-Marhum Sultan Haji Omar Ali Saifuddien Sa'adul Khairi Waddien, Sultan dan Yang Di-Pertuan Negara Brunei Darussalam itu dan sama-samalah kita mengamalkan doa qunut ini yang mana ia dibaca adalah untuk menolak kecelakaan, bala bencana atau bahaya yang menimpa seperti ketakutan, kemarau, wabak penyakit dan selainnya. Perkara ini pernah dilakukan oleh Rasulullah Shallallahu 'Alaihi Wasallam sendiri sebagaimana hadits sahih yang diriwayatkan oleh imam Abu Daud.

**-TAMAT-**

**Rujukan: KHEU/BPA/PR/APR/2020**

**Tarikh: 03 Ramadhan 1441H bersamaan 27 April 2020M**